

大寶積經

第四卷
卷六一 卷八〇

大寶積經

第四冊

卷六一
卷八〇

大寶積經卷第六十一

高齊北天竺三藏那連提耶舍譯

菩薩見實會第十六之一

序品第一

如是我聞。一時佛在迦毗羅國尼居陀林。與大比丘
衆千二百五十人俱。其名曰優樓毗螺迦葉。伽耶迦
葉。那提迦葉。摩訶迦葉。舍利弗。大目犍連。一切皆是
大阿羅漢。諸漏已盡。無復煩惱。其心自在。心善解脫。
慧善解脫。如大龍象所作已辦。皆棄重擔。逮得已利。
盡諸有結。於正教中。心得善解。於一切法。心無所礙。

到於彼岸。自得解脫。解脫眷屬。自得調伏。調伏眷屬。自得寂定。寂定眷屬。自得度脫。度脫眷屬。已到彼岸。彼岸眷屬。已到陸地。陸地眷屬。自得安隱。安隱眷屬。自得寂滅。寂滅眷屬。自破煩惱。破煩惱眷屬。自得沙門。沙門眷屬。自得息惡。息惡眷屬。自婆羅門。婆羅門眷屬。自除惡法。除惡法眷屬。自了知諸法。了知諸法眷屬。自能得度。能得度眷屬。自具諸德。具諸德眷屬。自無煩惱。無煩惱眷屬。自離五支。離五支眷屬。自得離障。離障眷屬。自得靜意。靜意眷屬。自具六通。具六通眷屬。自離憎愛。離憎愛眷屬。自守護一。

心守護一心眷屬。自念門具足。念門具足眷屬。自依四依。四依眷屬。自離種種諸見。離種種諸見眷屬。自棄諸希望。棄諸希望眷屬。自得盡行。盡行眷屬。自得事訖。事訖眷屬。自修。自修眷屬。自無濁念。無濁念眷屬。自斷有覺。斷有覺眷屬。自倚身行。倚身行眷屬。自得樂不動。樂不動眷屬。自心善解脫。心善解脫眷屬。自慧善解脫。慧善解脫眷屬。自得賢聖。賢聖眷屬。如是等比。得離枝葉。除去皮膚。唯有心實堅固而住。爾時世尊。於其後夜。露地而坐。時比丘衆。四面圍繞。爾時世尊。默然而住。觀比丘衆。告諸比丘。汝等諸人。訪

覓一人。堪能往化淨飯王者。爾時慧命阿若憍陳如。卽從座起。徧袒右肩。右膝著地。合掌向佛。卽便作禮。白佛言。世尊。我當往化淨飯王耶。佛言。汝止。憍陳如。汝今具足大師之德。不應往彼。時有慧命婆蹉摸及大名耶輸陀。優樓毗螺迦葉。摩訶迦葉。舍利弗。大目連等。各白佛言。世尊。我等堪能往化淨飯王也。佛告摩訶目連。汝等且止。汝等皆悉具足大師尊重之法。不應往化。爾時大德摩訶目連。卽作是念。世尊。今者欲令誰往化淨飯王耶。爾時目連。卽入如實三昧。以三昧力。莊嚴其心。卽得見佛。意之所念。在於慧命迦

廬陁夷欲令往化淨飯王耳。譬如重閣樓牕之中。日從東入。光照西壁。如是目連見世尊心。專在迦盧陁夷。欲令化王。亦復如是。爾時慧命目連卽從定起。往迦盧陁夷所。到已白言。世尊心念。知汝堪能往化淨飯王。迦盧陁夷汝今應當發大勇猛。速往化王。目連作是語已。時慧命迦盧陁夷白目連言。凡庶難化。何況國王。何以故。刹利種姓。灌頂大王。有自在力。難可化故。大目連譬如聚積衆柴。若二若三。乃至千載。如此柴聚。經多年歲。甚大乾燥。于時有人放火燒之。成大火聚。於意云何。此之火聚。甯爲大不。目連言甚大。

若復有人。更以無量酥油。澆灌此火。增盛不大。目連言。轉熾倍盛。於意云何。此火可近不。目連言。難可得近。如是大目連。刹利種姓。灌頂大王。難可教化。不可得近。亦復如是。大目連。譬如狂象之牙。可觸以不。目連言。不可觸也。如是大目連。灌頂刹利。難可教化。亦復如是。時慧命目連。復白優陀夷言。世尊心念。知汝堪能往化淨飯王也。優陀夷復白目連言。世尊實垂顧念。謂我堪能往化淨飯王耶。目連答言。世尊實誠念汝。謂汝堪能教化父王。爾時世尊。自告優陀夷言。優陀夷。汝可入城。教化父王。何以故。唯我與汝。堪能

教化淨飯王耳。優陀夷。我諸聲聞弟子之中。汝能教化諸邑聚落最爲第一。爾時世尊。卽以偈頌告優陀夷言。

諦聽優陀夷	汝能善教導	必令釋種喜
往化最勝王	王今受悟時	兼利諸天人
必得到彼岸	汝當速往化	釋種淨飯王
今懷恨亂濁	住念慧不行	猶如墜高崖
戀惜于高位	慧心盡迷沒	如商失重寶
追念生大苦	如天墜宮殿	追戀五欲樂
未知佛正法	悲哀大惱亂	自念失七寶

及與人四道	憶此聖王位	口出非法言
王時悲亂言	不覺已及他	如奪精魂鬼
執持於人身	猶在雞羅山	一切無所見
如是惱恨障	應見不復覩	亦如睡眠死
已心不自了	憂恨迷惑障	王不識自喜
如婦夫壻亡	悲淚生憂惱	王今癡惱亂
哀戀生大苦	汝具巧方便	往化淨飯王
摧倒邪慢幢	當建正法燈	更無有能化
淨飯大王者	唯汝優陁夷	過去曾同行
優陁夷當知	曾有大國王	名曰增長實

聲名震十方 如法作國王 一切皆歸化
能以正法治 王領四天下 城邑悉滿中
華果香園苑 多諸賢聖衆 無有雜惡人
芳林甚稠密 地淨無棘刺 多饒淨妙等
華池莊嚴好 人民廣熾盛 棄惡常善住
閉諸惡趣門 必昇妙天道 彼王昔有子
曾廣供養佛 備修諸善根 具足諸功德
名曰妙堅慧 億衆所供養 常見色欲過
棄家樂閑靜 父王勅子言 汝可受五欲
嫖女自娛樂 遊觀寶宮池 我今爲汝辦

玩弄無乏少 云何不受樂 汝當說其意

知諸趣善妙 汝受寶宅中 女寶常圍繞

妙境甚可樂 諸仙處閑林 猶捨退還家

受諸色欲樂 況汝無乏少 嫫女衆圍繞

王臣皆隨從 臺館若天宮 應受五欲樂

諸女甚端正 美麗若天人 善奏歌舞樂

可以自娛意 目如優波葉 脣赤若含丹

面滿廣黛眉 平額姝咽頸 臂平缺骨滿

譬如象王鼻 掌如蓮華色 指圓臚纖好

舌薄廣紅赤 美言若甘露 齒素利齊密

珠纓寶衣服 齋淡腹不現 脊如金剛杵
髀股臚圓直 伊尼鹿王膺 行步如鵝王
皆各瞻視汝 盛年甚可愛 堪能存後嗣
汝及衆麗人 猶如春華開 盛年色未退
應當速受樂 堅慧白父王 王言非正理
若有如法語 所勅不敢違 王聽我今說
樂善真實語 乃至於夢中 不起姪欲想
父王今此言 智者所不許 愚者樂此事
明人常所厭 何故明目人 而羨盲瞽導
豈有岸上人 反樂沉溺者 何有解脫人

而復樂牢獄 豈有安樂人 欽羨衆苦者

我意觀父王 如盲溺獄者 如夢受五欲

復爲欲所溺 父王如盲冥 我目見殊勝

王爲欲所漂 我今甚猷賤 欲如毒藥器

亦如毒蛇頭 如利刀劍稍 亦如大猛火

王臣勸化時 堅慧悉不許 捐親及國土

棄欲而出家 如蛇脫故皮 亦如棄涕唾

遠離於過惡 絕望永出家 堅慧捨俗時

臣子隨出家 其人名月施 棄欲隨堅慧

童子出家已 并及大臣子 成就四梵住

具足五神通 深見五塵過 超絕於欲界
轉正妙法輪 直生梵天上 童子出家已
父王起嫌恨 月施詣王所 善化令王喜
優陀夷當知 昔時堅慧者 遠離於五欲
今卽我身是 優陀夷當知 彼時增實王
豈爲異人乎 淨飯王是也 優陀夷當知
隨我出家者 月施汝身是 亦曾化增實
是故優陀夷 今應化父王 必有大利益
昔曾教化故

爾時慧命優陀夷受佛教已默然許可。時優陀夷過

夜曉已。至於食時。著衣持鉢。入迦毗城。時有釋種一
千餘人。集在王門。皆有所須。時淨飯王。聞佛如來到
迦毗城。在尼居林。起嫌恨意。此兒出家。退我種族。富
貴大樂。如其在家。應紹金輪。王四天下。如法統領。民
無逆命。七寶具足。其七者何。一曰輪寶。二曰象寶。三
名馬寶。四曰摩尼寶。五稱女寶。六曰主藏臣寶。七稱
導師寶。具足千子。勇健難當。顏容美妙。能摧強敵。護
四天下。不以刀杖料理國土。如法治正。自然泰平。我
得輪王。自在快樂。彼應尊重。供養於我。以兒出家。故
所應得者。悉皆墜落。作是念已。勅諸釋種。一切不得

至我兒所敬信聽法。若有犯者。當斬其首。時有釋種名曰喜面。不在衆中。不聞王敎。見優陁夷。卽往其所。稽首白言。善來尊者。得平安耶。世尊安樂。少病少惱。起居輕利。在路不疲。供饌不乏也。時優陁夷報喜面言。如來安樂。少病少惱。起居輕利。在路不疲。飲食無乏。時有釋種名曰善覺。見喜面其優陁夷在屏處。語亦詣其所。自言大德。自遠而來。比康吉耶。世尊起居安樂。少病少惱。在路不疲。供饌無乏耶。優陁夷答言。如來聖御安樂。在路不疲。無所乏少。爾時復有二釋種。一名無憂。二名離憂。見喜面善覺其優陁夷在於